


官板

衆妙集

全

土岐文庫  
文庫17  
W78





姚合為武功主簿、世號姚武功、編極玄集

衆妙集一卷、宋趙師秀編、師秀有清苑齋集、已著錄、是集錄唐代五七言律詩、起沈佺期、訖王貞白、共七十六人、不甚詮次先後、五言居十之九、七言僅十之一、師秀之詩、大抵沿溯武功一派、意境頗狹、而是集乃以風度流麗為宗、多近中唐之格、馮氏才調集凡例、謂其惟取名句、殆不盡然、陳振孫書錄解題不載其名、此本明季出自嘉興屠用明家、寒山趙靈均、以授常熟馮班、班寄毛晉刊之、始傳於世、其書晚出、故談執家罕論及之、然其去取之間、確有法度、不似明人所依托、疑當時偶爾選錄、自供吟咏、非有意勒一編、故前後無序跋、亦未刊版行世、惟傳其師法者、轉相繕寫、幸留於後耳、觀其有近體而無古體、多五言而少七言、確為四靈門徑、與其全集、可以互相印證、明末作偽之人、斷不能細意瞻合如是也

(四庫全書總目提要卷一百八十七)

家數猶云家法也、蓋謙辭

趙天樂選唐衆妙集家數

沈佺期二首

盧象一首

王維七首

孟浩然四首

錢起八首

周賀九首

于武陵三首

李頻六首

秦系二首

劉長卿二十三首

李嘉祐九首

楊巨源二首

劉得仁三首

朱慶餘五首

雍陶四首

郎士元四首

衆妙集





緯全唐詩作漳  
唐姚合極玄集  
作漳一作若小傳  
云或作緯

崔塗七首

皇甫曾二首

皇甫冉九首

包佶一首

司空曙六首

耿緯五首

嚴維二首

李端四首

韓翃三首

戴叔倫五首

盧綸七首

祖詠二首

綦母潛一首

方干七首

靈一三首

無可三首

護國一首

貫休二首

岑參二首

張衆甫一首

張南史一首

周朴一首

張蠡三首

張祐四首

李季蘭一首

許渾二首

張佐一首

馬戴二首

張循之一首

張繼一首

章八元一首

李益二首

張喬一首

呂溫一首

于鵠一首

崔顥一首



項斯三首

崔峒一首

包何一首

竇常一首

趙嘏一首

薛能一首

劉威一首

鄭谷一首

韓偓一首

羅隱一首

李羣玉一首

皮日休一首

杜荀鶴五首

張籍三首

任藩二首

劉商一首

楊發一首

處默一首

~~無可三首~~

以下三十九人目錄重複當刪之

~~護國一首~~

~~貫休二首~~

~~岑參二首~~

~~張衆甫一首~~

~~張南史一首~~

~~周朴一首~~

~~張蠡三首~~



張祐四首

李季蘭一首

許渾二首

張佐一首

馬戴二首

張循之一首

張繼一首

章八元一首

此下三首皆在目錄中

李益二首

張喬一首

呂溫一首

于鵠一首

崔顥一首

項斯三首

崔峒一首

包何一首



竇常一首

趙嘏一首

薛能一首

劉威一首

鄭谷一首

韓偓一首

羅隱一首

李羣玉一首



賦天

皮日休一首

杜荀鶴五首

張籍三首

任藩二首

劉商一首

楊發一首

處默一首

戎昱一首



文庫 17  
W 78

衆妙集

汲古閣

于良史一首

王灣一首

林寬一首

劉禹錫八首

王貞白一首

已上七十六家共二百二十八首

趙天樂選唐衆妙集家數

昭和六十年二月一日贈  
王岐善唐氏寄



衆妙集

汴人趙師秀紫芝編

沈佺期

塞北

胡騎犯邊埃。風從丑上來。五原烽火急。六郡羽書催。冰  
壯飛狐冷。霜濃候鴈哀。將軍朝授鉞。戰士夜銜枚。紫塞  
金河裏。葱山鐵勒隈。蓮花秋劒發。桂葉曉旗開。祕略三  
軍動。妖氛百戰摧。何言投筆去。終作勒銘回。

同蘇員外味玄夏晚寓直省中

衆妙集

唐詩紀事卷六蘇味  
道係云趙州人趙里  
人李嶠號蘇李武后  
時為相世為模稜手  
全唐詩卷四詩題  
作州蘇員外味道  
題夏寓直省中見

寬按味玄即味道之誤  
全唐詩為是蘇味道舊書  
卷五新書卷百十四有傳又唐  
詩紀事卷六載詩五首

模稜  
是非  
之謂

丑上謂東北



並命登僊閣。分宵直禮闈。大官供宿膳。侍史護朝衣。卷幔天河入。當階月露微。小池殘暑退。高樹晚涼歸。冠劍無時釋。軒車待漏飛。明朝題漢柱。三署有光輝。

盧象

趙都護宴別

結客候旌麾。元戎復在斯。門開都護府。兵動羽林兒。黠虜多翻覆。謀臣有別離。智同天所授。恩向日相隨。漢使開賓幕。胡笳送酒卮。風霜迎馬首。雨雪事魚麗。在策應無戰。深情屬載馳。不應行萬里。明主寄安危。

王維

從岐王過楊氏別業

楊子談經所。淮王載酒過。興闌啼鳥喚。坐久落花多。逕轉回銀燭。林開散玉珂。嚴城時未啓。前路擁笙歌。

山居

寂寞掩柴扉。蒼茫對落暉。鶴巢松樹遍。人訪蕁門稀。綠竹含新粉。紅蓮落故衣。渡頭燈火起。處處採菱歸。

終南山行

太乙近天都。連山到海隅。白雲廻望合。青靄入看無。分

喚當  
作換



野中峰變陰晴衆壑殊。欲投入宿處。隔水問樵夫。

○觀獵

風勁角弓鳴。將軍獵渭城。草枯鷹眼疾。雪盡馬蹄輕。忽過新豐市。還歸細柳營。迴看射鴈處。千里暮雲平。

○送丘為落第歸江東

憐君不得意。況復柳條春。為客黃金盡。還家白髮新。五湖三畝宅。萬里一歸人。知爾不能薦。羞稱獻納臣。

○送晁監歸日本

積水不可極。安知滄海東。九州何處所。萬里若乘空。向

國惟看日。歸帆但信風。鼉身映天黑。魚眼射波紅。鄉樹扶桑外。主人孤島中。別離方異域。音信若為通。

○秋歸輞川莊作

唐詩鼓吹卷二收此首作秋雨輞川莊上

積雨空林烟火遲。蒸藜炊黍餉東菑。漠漠水田飛白鷺。陰陰夏木嘯黃鸝。山中習靜觀朝槿。松下清齋折露葵。野老與人爭席罷。海鷗何事更相疑。

孟浩然

○歲晚歸南山

北闕休上書。南山歸敝廬。不才明主棄。多病故人疎。白

寬按。元稹王右丞集。以下諸本詩題俱作積雨輞川莊。恐非是。



髮催年老。青陽逼歲除。永懷愁不寐。松月夜窻虛。

○夜渡湘水

客行貪利涉。夜裏渡湘川。露氣聞芳杜。歌聲識採蓮。榜人投岸火。漁子宿潭烟。行旅時相問。潯陽何處邊。

○洞庭湖

八月湖水平。涵虛混太清。氣蒸雲夢澤。波動岳陽城。欲濟無舟楫。安居恥聖明。坐看垂釣者。空有羨魚情。

○過故人莊

故人具雞黍。邀我至田家。綠樹村邊合。青山郭外斜。開

筵面場圃。把酒話桑麻。待到重陽日。還來就菊花。

錢起

送劉相公催轉運事

國用資戎事。臣勞爲主憂。將徵任土貢。更發濟川舟。擁傳星還去。過池鳳不留。惟高飲冰節。稍淺別家愁。落葉淮邊雨。孤山海上秋。遙知謝公興。微月在江樓。

○送少微師西行

隨緣忽西去。何日返東林。世路無期別。空門不住心。人烟一飯少。山雪獨行深。天外猿啼處。誰聞清梵音。



暇日題草堂

爲郎過壯歲。晚景對秋天。門掩蒼苔上。池清寒竹前。通經未拾紫。煉藥不成仙。且醞東臯黍。愁來得醉眠。

寄郢州郎使君

龍節知無事。江城不揜扉。詩傳過客遠。書到故人稀。坐嘯看潮起。行春送鴈歸。望舒三五夜。思盡謝玄暉。

○送彈琴李長史赴洪州

抱琴爲傲吏。孤擢復南行。幾處秋江水。皆添白髮聲。佳期來客夢。幽興緩王程。佐牧無勞問。心和政自平。

○裴廸書齋翫月

夜來詩酒興。月上謝公樓。影閉重門靜。寒生獨樹秋。鵲驚隨葉散。螢遠入烟流。今夕遙天末。清輝幾處愁。

○闕下逢閻舍人

二月黃鸝飛上林。春城紫陌曉沉沉。長樂鐘聲花外盡。龍池柳色雨中深。陽和不散窮途恨。霄漢長懸捧日心。獻賦十年猶未遇。羞將白髮戴華簪。

石門春暮

自笑鄙夫多野性。貧居數畝半臨湍。溪雲雜雨來茆屋。



山雀將雛傍藥欄。仙籙滿床閑不厭。陰符在篋老羞看。更憐童子宜春服。花裏尋師到杏壇。

周賀

贈幼羣法師

北京從別後。南越幾聽砧。住久白髭出。講長黃葉深。香連隣舍像。磬徹遠巢禽。寂寞應關道。何人見此心。

贈柏巖禪師

野寺絕依念。空山曾遍行。老來披衲重。病起讀經生。乞食嫌村遠。尋溪愛路平。多年柏巖住。不識柏巖名。

如空上人移居

竹溪人請住。何日向中峰。瓦舍山情少。齋身病色濃。臘高移坐次。菊淺露行蹤。來往湓城下。三年兩度逢。

哭柏巖

林逕西風急。松枝講抄餘。凍髭亡夜剃。遺偈病時書。地燥焚身後。堂空著影初。此時頻下淚。曾省到吾廬。

寄朱餘慶

已當聽鴈夜。多事不同居。故疾離城晚。秋霖見月疎。趁鐘關靜戶。帶葉卷殘書。蕩槩期南去。荒園久廢鋤。

當作朱慶餘



玉芝觀張道士房

四面松山合。空堂畫老僊。蠹根停雪水。曲角積茶烟。道  
至機心盡。宵清琴韻全。獨嫌來又去。不得坐經年。

再經王叟居

停撓因舊識。白髮間波濤。以我往來倦。知君耕稼勞。渚  
田臨舍盡。坂路出簷高。愛此還南去。終期會爾曹。

贈李主簿

稅時兼主印。每日得閑稀。對客放科吏。為官亦典衣。案  
遲吟坐待。宅近步行歸。見說論詩道。應愁斷是非。放一作方

贈厲玄侍御

山松逕與瀑泉通。巾舄行吟想越中。塞鴈去經華表末。  
鄉僧來自海濤東。關分河漢秋鐘絕。露滴獼猴夜岳空。  
抱疾因尋周柱史。杜陵寒葉落無窮。

于武陵

客中

楚人歌竹枝。遊子淚沾衣。異國久為客。寒宵頻夢歸。一  
封書未返。千樹葉皆飛。南過洞庭水。更應消息稀。

贈王隱人



石室掃無塵。人寰與此分。飛來南浦樹。半是華山雲。浮  
世幾多事。先生應不聞。寒川滿斜日。空照鴈成羣。

○南游有感

杜陵無厚業。不得駐車輪。重到曾游處。多非舊主人。東  
風千里樹。西日一洲蘋。又渡湘江水。湘江水復春。

李頻

送人歸新定

歸心常共知。歸路不相隨。彼此無依倚。東西又別離。山  
雲含雨亞。江樹逆潮欹。莫戀漁樵興。人生各有爲。

送人南歸

行行野雲薄。寒氣日通春。故國入芳草。滄江終白身。遊  
歸花落滿。睡起鳥啼新。不得來書札。空令借問人。

宿慈恩寺遂上人院

滿閣終南色。清秋獨倚欄。風高斜漢動。葉下曲江寒。帝  
里求名老。空門見性難。吾師無一事。不似在長安。

尋華山隱者

自入華山居。關東相見疎。匏中誰寄酒。葉上我留書。巢  
鳥寒栖盡。潭泉暮凍餘。長聞得藥力。此說復何如。



贈規上人

竹向空齋合。無僧在四鄰。去雲離坐石。斜月到禪身。樹老風終夜。山寒雪見春。不知諸祖後。傳印是何人。

張司馬別業

庭前樹盡手中栽。先後花分幾度開。巢鳥戀雛驚不起。野人思酒去還來。自拋官與青山近。誰許身爲白日催。門外尋常行樂處。重重履迹在莓苔。

秦系

山中贈張評事時授右衛佐

終年常避喧。師事五千言。流水閑過院。春風與閉門。山容邀上客。桂實落華軒。莫強教予起。微官不足論。

秋晚朱拾遺訪山居

不逐時人後。終年獨閉關。家中貧自樂。石上臥常閑。墜栗添新味。殘花帶老顏。侍臣當獻納。那得到空山。

劉長卿

酬包諫議見寄

佐郡棄頑疎。殊方親里閭。家貧寒未度。身老歲將除。過雪山僧至。依陽野客舒。藥陳隨遠宦。梅發對幽居。落日



棲鴉鳥。行人達鯉魚。高文不可和。空愧學相如。

○尋常山南溪道人隱居

一路經行處。莓苔見履痕。白雲依靜渚。春草閉閑門。過雨看松色。隨山到水源。溪花與禪意。相對亦忘言。

○漂母墓

咎賢懷一飯。茲事已千秋。古墓樵人識。前朝楚水流。渚蘋行客薦。山木杜鵑愁。春草茫茫綠。王孫舊此游。

北歸次秋浦界清溪館

萬里猿頻斷。孤村客暫依。鴈過彭蠡暮。人向宛陵稀。舊

路青山在。餘生白首歸。漸知行近北。不見鷓鴣飛。

題思禪寺上方

上方幽且暮。臺殿隱矇矓。遠磬秋山裏。清猿古木中。一溪連竹路。諸嶺共松風。儻許棲林下。甘成白首翁。

題裴式微餘干東齋亭

世事終成夢。生涯半欲過。白雲心已矣。滄海意如何。藜杖全吾道。榴花養太和。春風騎馬醉。江月釣魚歌。散帙看蟲蠹。開關見雀羅。遠山終日在。芳草傍人多。吏體莊生傲。方言楚俗訛。屈平君莫弔。腸斷洞庭波。



酬秦系

鶴書猶未至，那出白雲來。舊路經年別，寒潮每日回。家  
空歸海燕，人老發江梅。最憶門前柳，閑居手自栽。

新安送穆喻德歸朝

九重宣室召，萬里建溪行。事直皇天在，歸遲白髮生。用  
才身復起，覩聖眼猶明。離別寒江上，潺湲若有情。

尋洪尊師不遇

古木無人地，來尋羽客家。道書堆玉案，僊帔疊青霞。鶴  
老難知歲，松寒未作花。山中不可見，何處化丹砂。  
松或作梅

○月下呈章秀才

自古悲搖落，誰家奈此何。夜蛩偏傍枕，寒鳥數移柯。向  
老三年謫，當秋百感多。家貧惟有月，空愧子猷過。

○送鄭十二歸廬山

潯陽數畝宅，歸臥掩柴關。谷口何人在，門前秋草閑。忘  
機賣藥罷，不語杖藜還。舊筍成寒竹，空齋向暮山。水流  
過舍下，雲去到人間。桂樹花應發，因行寄一攀。

○長沙王墓下別張南史

長沙千載下，春草獨萋萋。流水朝還暮，行人東復西。苔



碑幾字滅。山木萬株齊。唯有年芳在。相看見解攜。

送李中丞歸漢陽別業

流落征南將。曾驅十萬師。罷歸無舊業。老去戀明時。獨立三邊靜。輕生一劍知。茫茫漢江上。日暮欲何之。

過張明府別業

寥寥東郭外。白首一先生。考滿孤琴在。家移五柳成。夕陽臨水釣。春雨向田耕。終日空林下。何人識此情。

送鄭說之歙州謁辭侍郎

漂泊來千里。謳歌滿百城。漢家尊太守。魯國重諸生。俗

變人難理。江傳水至清。船經危石住。路入亂山行。老得滄洲趣。春傷白骨情。嘗聞馬南郡。門下有康成。

謫至干越亭作

天南愁望絕。亭上柳條新。落日獨歸鳥。孤舟何處人。生涯投越徼。世業陷胡塵。杳杳鍾陵暮。悠悠鄱水春。秦臺悲白首。楚澤怨青蘋。草色迷征路。鶯聲傍逐臣。獨醒翻引笑。直道不容身。得罪風霜苦。全生天地仁。青山數行淚。滄海一窮鱗。牢落機心盡。唯憐鷗鳥親。

秋日登吳公臺上寺寺即陳明徹戰場



古臺搖落後。秋入望鄉心。野寺來人少。雲峰隔水深。夕陽依舊壘。寒磬滿空林。惆悵前朝事。長江獨至今。

○碧澗別墅喜皇甫十六侍御相訪

荒村帶返照。落葉亂紛紛。古路無行客。寒林獨見君。野橋經雨斷。澗水向田分。不爲憐同病。何人到白雲。

吳中贈別嚴士元

東風倚棹闔閭城。水國春寒陰復晴。細雨溼衣看不見。開花落地聽無聲。日斜江上孤颿影。草綠湖南萬里程。東道若逢相識問。青袍今已誤儒生。

○過賈誼宅

三年謫宦此棲遲。萬里唯留楚國悲。秋草獨尋人去後。寒林空見日斜時。漢文有道恩猶薄。湘水無情弔豈知。寂寂江山搖落處。憐君何事到天涯。

送柳史君赴袁州

宜陽出守新恩至。京國因家始願違。五柳閉門高士去。三苗按節遠人歸。月明江路聞猿斷。花暗山城見吏稀。惟有郡齋窻裏岫。朝朝長對謝玄暉。

獻南平王



建牙吹角不聞喧。亂世登壇衆所尊。家散萬金酬士死。  
身持一劔答君恩。漁陽老將多回席。魯國諸生半在門。  
白馬翩翩春草細。邵陵西去獵平原。

次陸安寄友人

新年草色遠萋萋。久客將歸失路蹊。暮雨不知浪口處。  
春風只到穆陵西。孤城盡日空花落。三戶無人但鳥啼。  
君在江南相憶否。門前五柳幾枝低。

李嘉祐

南浦渡口

寂寞橫塘路。新篁覆水低。東風潮信滿。時雨稻秔齊。寡  
婦供租稅。漁人逐鼓鼙。慚無卓魯術。解印謝黔黎。

送房明府罷長寧令

君爲萬里宰。恩及五湖人。未滿先求退。居閑不厭貧。遠  
峰晴更近。殘柳雨還新。要自趨丹陛。明年雞樹親。

送岳州司馬弟之任

岳陽天水外。念爾一舫過。野墅人煙少。山林鴈影多。有  
時巫峽色。終日洞庭波。丞相今爲郡。應無勞者歌。

送王牧往吉州謁使君叔



細草綠汀洲。王孫耐薄游。年華初冠帶。文體舊弓裘。野  
渡花爭發。春塘水亂流。使君憐小阮。應念倚門愁。

自常州還江陰道中

處處空籬落。江村不忍看。無人花色慘。多雨鳥聲寒。黃  
霸初臨郡。陶潛未罷官。乘春務征伐。誰肯問凋殘。

和都官苗員外秋夜寓直對雨書所懷

多雨唐宮夜。仙郎寓直時。漏長丹鳳闕。秋冷白雲司。螢  
影侵堦亂。鴻聲出苑遲。蕭條吏人散。小謝有新詩。唐一作南

與從弟正字兄兵曹宴集

竹窻松戶有佳期。美酒香茶慰所思。輔嗣外生偏解易。  
惠連羣從總能詩。簷前花落春波後。谷口鶯啼日暮時。  
去路歸家仍待月。垂鞭不控馬行遲。

暮春宜陽郡。齋愁坐忽枉劉七侍御詩。因以酬荅。  
子規夜夜啼楸葉。遠道逢春半是愁。芳草伴人還易老。  
落花隨水亦東流。山臨睥睨常多雨。地接瀟湘良及秋。  
惟羨君為周柱史。手持黃紙到滄州。

楊巨源

從太和公主和番



北路古來難。年光獨認寒。朔雲侵鬢起。邊月向眉殘。蘆  
井尋沙到。花門度磧看。薰風一萬里。來處是長安。

春日奉酬聖壽無疆詞

代是文明晝。春當宴喜時。爐烟添柳重。宮漏出門遲。漢  
典方寬律。周官正採詩。碧霄傳鳳吹。紅旭在龍旗。造化  
膺神器。陽和沃聖慈。無因隨百獸。率舞在丹墀。門或作花

劉得仁

題故靜祥院

寂寞身何在。門人隔此生。影懸塵已厚。塔種柏初成。溪

院秋先雪。空堂古有精。當時挂錫樹。樹老數枝傾。

宿僧院

禪地無塵夜。焚香話所歸。樹搖幽鳥夢。螢入定僧衣。破  
月斜天半。高河下露微。翻令嫌白日。動即與心違。

吳天觀新栽竹

清風枝葉上。山鳥已棲來。根別古溝岸。影生秋觀苔。遍  
思諸草木。惟此出塵埃。恨為移居晚。空庭更擬栽。

朱慶餘

上江州李員外



起家聲望重。自古更誰過。得在朝廷少。還因諫諍多。經年愁瘴癘。幾處想恩波。入境無餘事。唯聞父老歌。

○送淮陰丁明府

之官未及境。已有愛人心。遣吏回中路。停船對遠林。鳥聲淮浪靜。雨色稻苗深。暇日公門掩。唯聞伴客吟。

○上張水部

出入門闌久。兒童亦有情。不忘將姓字。長說向公卿。每許連床坐。時聞並馬行。恩深轉無語。懷抱自分明。

送霑州幕官韋校書

共知行樂處。猶識此時分。職已爲書記。官曾校典墳。寒城初落葉。高樹遠生雲。邊事何須問。深謀只在君。

哭胡遇

尋僧昨夜尚相隨。忽見緋幡意可知。題處舊詩休更讀。置來新馬憶曾騎。不應隨分空營奠。終擬求人爲立碑。每作宣陽里中過。遙聞哭臨淚先垂。

雍陶

○送裴璋還蜀

家在劔門外。新年音信稀。自爲千里別。已送幾人歸。陌



上日初落馬前花正飛。離言殊未盡。春雨滿行衣。

塞上宿野寺

塞上蕃僧老。天寒疾上關。遠烟平似水。高樹暗如山。去馬朝常急。行人夜始閑。更深聽刁斗。時到磬聲間。

同賈島宿無可院

何處消愁寔。攜囊就遠僧。中宵吟有雪。空屋語無燈。靜院惟聞鐸。寒床但枕肱。還因愛閑客。始得見南能。

寄宗靜上人

世上方傳法。山中未得歸。閑花飄講席。馴鴿污禪衣。積

雨誰過寺。殘鐘自掩扉。寒來垂項帽。白髮剃應稀。

郎士元

送友人別

暮蟬不可聽。落葉豈堪聞。共是悲秋客。那知此路分。荒城背流水。遠鴈入寒雲。陶令門前菊。餘花可贈君。

送奚賈歸吳

東南富春渚。曾是謝公游。今日奚生去。新安江正秋。水容清過客。楓葉落行舟。遙想赤亭下。聞猿應夜愁。

送彭將軍赴定州



雙旌漢飛將。萬里授橫戈。春色臨關盡。黃雲出塞多。鼓  
鼙悲絕漠。烽火隔長河。莫斷陰山路。天驕已請和。

冬夕寄青龍寺源公

歛屨入寒竹。安禪過漏聲。高杉殘子落。澗井凍痕生。罷  
磬風枝動。懸燈雪屋明。何當招我宿。乘月上方行。

崔塗

旅舍別故人

一日又欲暮。一年看又殘。病知新事少。老別舊交難。山  
盡路猶險。雨餘春尚寒。那堪試回首。烽火是長安。

蜀城春望

天涯憔悴身。一望一霑巾。在處有芳草。滿城無故人。懷  
才皆得路。失計獨傷春。青鏡不忍照。鬢毛應更新。

夕次洛陽道中

秋風吹故城。城下獨吟行。高樹鳥已息。古原人尚耕。流  
年川暗度。往事月空明。不復嘆岐路。馬頭塵夜生。

屈原廟

讒勝禍難防。沈寃信可傷。本圖安楚國。不是怨懷王。廟  
古碑無字。洲暗蕙有傷。獨醒人尚少。誰與奠椒漿。







巫山高

巫峽見巴東。迢迢出半空。雲藏神女館。雨到楚王宮。朝暮泉聲落。寒暄樹色同。清猿不可聽。偏在九秋中。

送韓司直

又見劉隨州集

游吳還適越。來往任風波。復送王孫去。其如春草何。山明殘雪在。湖滿夕陽多。季子留遺廟。停舟試一過。

西陵寄一公

西陵遇風處。自古是通津。終日空江上。雲山若待人。汀洲寒事早。魚鳥興情新。南望山陰路。吾心有所親。

送元盛歸潛山

深山秋事早。君去復何如。裊露收新稼。迎寒葺舊廬。題詩即招隱。作賦是閑居。別後空相憶。嵇康懶寄書。

酬崔侍御期籍道士不至見寄

一心求妙道。幾歲候真師。丹竈今何在。白雲無定期。崑崙烟景絕。汗漫往來遲。君但焚香待。人間到有時。

送王相公赴幽州

自咎蕭曹德。難兼衛霍功。勤勞無遠近。旌節屢西東。不選山河卒。還令萬里通。御閑分善馬。武庫出瑠弓。遮虜



關山靜。防秋鼓角雄。徒思一攀送。羸病華門中。

獨孤中丞筵陪餞韋使君赴昇州

中司龍節貴。上客虎符新。地控吳襟帶。才光漢縉紳。汎舟應度臘。入境便行春。何處歌來暮。長干建業人。

三月三日李明甫後亭汎舟

江南烟景復如何。聞道新亭更可過。處處藝蘭春浦綠。萋萋耕草遠山多。壺觴雖就陶彭澤。風俗猶傳晉永和。更使輕撓徐轉去。微風落日水增波。

秋日東郊作

閑看秋水心無事。臥對寒松手自栽。廬嶽高僧留偈別。茅山道士寄書來。燕知社日辭巢去。菊爲重陽冒雨開。淺薄將何稱獻納。臨岐終日自徘徊。

包佶

嶺下臥病寄劉長卿

惟有貧兼病。能令親愛疎。歲時供放逐。身世付空虛。脛弱秋添絮。頭風曉廢梳。波瀾喧衆口。藜藿靜吾廬。喪馬思開卦。占鴉懶發書。十年江海隔。離恨子知予。

司空曙



耿緯就宿因傷故人

舊時聞笛淚。此夜重沾衣。方恨同懷少。那堪相見稀。竹  
烟凝澗壑。林雪似芳菲。多謝勞車馬。應憐獨掩扉。

過寶慶寺

黃葉前朝寺。無僧寒殿開。池晴龜出曝。松暮鶴飛回。古  
井碑橫草。陰廊畫雜苔。禪宮亦銷影。塵世轉堪哀。

○雲陽館與韓申卿宿別

故人江海別。幾度惜山川。乍見番疑夢。相悲各問年。孤  
燈寒照雨。溼竹暗浮烟。更有明朝恨。離杯惜共傳。

番當作翻

春日野望寄錢員外起

草長花落樹。羸病強尋春。無復少年意。空餘華髮新。青  
原晴見水。白社靜逢人。寄謝南宮客。軒車不可親。

喜外弟盧綸見宿

靜夜無四鄰。荒居舊業貧。雨中黃葉樹。燈下白頭人。似  
我獨沈久。愧君相見頻。平生自有分。况號蔡家親。號一作是

○送王閏

相送臨寒水。蒼茫望故關。江蕪連夢澤。楚雪入商山。話  
我他年舊。看君此日還。因將自悲淚。一灑別離顏。



耿緯

邠州留別

終歲山川路。生涯竟若何。艱難為客慣。貧賤受恩多。暮  
角飄殘韻。寒流起細波。懸愁茂陵宅。喜色又相過。

早朝

鐘鼓餘聲裏。千官向紫微。冒寒人語少。乘月燭來稀。清  
漏聞馳道。紅霞映鎖闥。猶看嘶馬處。未啓掖垣扉。

贈張將軍

寥落軍城暮。重門返照間。鼓鼙經雨暗。士馬過秋閑。慣

守臨邊郡。曾營近磧山。關西舊業在。夜夜夢中還。

沙上鴈

衡陽多道里。弱羽復哀音。還塞欲何處。驚絃亂此心。夜  
陰前侶遠。秋冷後湖深。獨立沙汀意。寧知霜霰侵。

贈朗公

來自西天竺。持經奉紫微。年深梵語變。行苦俗流歸。日  
上安禪久。苔生出院稀。梁間有馴鴿。不去為無機。

嚴維

○送李端



故關衰草遍。離別正堪悲。路出寒雲外。人歸暮雪時。少  
孤爲客早。多難識君遲。拚泣空相向。風塵何所期。

酬劉員外見寄

蘇耽佐郡時。近出白雲司。藥補清羸疾。窻吟絕妙詞。柳  
塘春水慢。花塢夕陽遲。欲識懷君意。朝朝問檝師。

李端

巫山高

巫山十二峰。皆在碧虛中。廻合雲藏日。霏微雨帶風。猿  
聲寒過水。樹色暮連空。愁向高堂宿。清秋見楚宮。

聞蟬寄友人

昨日始聞鶯。今朝蟬又鳴。朱顏向白日。定是幾年程。故  
國白雲遠。閑居秋草生。因垂數行淚。書寄十年兄。

茂陵山行陪韋金部

宿雨朝來歇。空山天氣清。盤空雙鶴下。隔水一蟬鳴。古  
道黃花落。平蕪赤燒生。茂陵雖有病。猶得伴君行。

雲際中峰

自得中峰住。深林亦閉關。經秋無客到。入夜有僧還。暗  
澗泉聲小。荒岡樹影閑。高亭不可望。星月滿空山。



韓翃

題薦福寺衡嶽禪師房

春城乞食還。高論此中閑。僧臘塔前樹。禪心江上山。疎  
簾看雪卷。淡戶映花關。晚送門人去。鐘聲杳靄間。

送元詵還江東

過江秋色在。詩興與歸心。客路緣楓岸。家人掃橘林。潮  
聲當晝起。山翠近南深。幾日華陽洞。寒花引獨尋。

送王相公赴幽州

黃閣開帷幄。丹墀拜冕旒。位高湯左相。權總漢諸侯。不

改周南化。仍分趙北憂。雙旌過易水。千騎入幽州。塞草  
連天暮。邊風動地秋。無因陪遠道。結束佩吳鉤。

戴叔倫

除夜宿石頭驛

旅館誰相問。寒燈獨可親。一年將盡夜。萬里未歸人。寥  
落悲前事。支離笑此身。愁顏與衰髮。明日又逢春。

吳明府留遠至留宿

出門逢故友。衣服滿塵埃。歲月不可問。山川何處來。綺  
城容敝宅。散職寄靈臺。自此留君醉。相懽得幾回。



○逢許評事

萬里楊柳色。出關逢故人。輕烟覆流水。落日照行塵。積  
夢江湖遠。憶家兄弟貧。徘徊霸亭上。不語共傷春。

漸次涪州先寄王員外使君

文教通夷俗。均輸問火田。江分巴子水。樹接夜郎烟。毒  
瘴含秋氣。陰厓閉曙天。路難空計日。身老不由年。將命  
寧知遠。歸心詎可傳。星郎復何事。出守五溪邊。

汝南別董校書

擾擾倦行役。相逢陳蔡間。如何百年內。不見一人閑。對

酒惜餘景。問程愁亂山。秋風萬里至。又出穆陵關。

盧綸

題苗員外林亭

高甃絕行塵。開簾似有春。風傾竹上雪。山對酒邊人。步  
暖先逢日。書空遠見鄰。還因內齋暇。登賞及諸姻。

得嶺南故人書

瘴海寄雙魚。中宵達我居。兩行燈下淚。一紙嶺南書。地  
說炎蒸極。人稱老病餘。殷勤報賈誼。莫共酒杯疎。

春日同李庶子遵善寺東院曉望



映竹水橫分。當山起鴈羣。陽峰高對寺。陰井下通雲。雪  
畫惟逢鶴。花時此見君。由來禪誦地。多有謝公文。

題興善寺後池

隔窻棲白鳥。似與鏡湖鄰。月照何年樹。花逢幾世人。岸  
蒹青有露。苔迳綠無塵。願得依容止。僧中老此身。

李沆園林

古巷牛羊出。重門接柳陰。閑看入竹路。自有向山心。種  
藥齊幽樹。耕田到遠林。願同詞賦客。得興謝家深。

酬暢當嵩山尋道士見寄

聞逐樵夫閑看棋。忽逢人世是秦時。開雲種玉嫌山淺。  
度海傳書怪鶴遲。陰洞石幢微有字。古壇松樹半無枝。  
煩君遠示青囊錄。願得相從一問師。

晚次鄂州

雲開遠見漢陽城。猶是孤帆一日程。估客晝眠知浪靜。  
舟人夜語覺潮生。三湘愁鬢逢秋色。萬里歸心對月明。  
舊業已隨征戰盡。更堪江上鼓鼙聲。

祖詠

蘇氏別業



別業居幽處。到來生隱心。南山當戶牖。豐水在園林。竹  
覆經冬雪。庭昏未夕陰。寥寥人境外。閑坐聽春禽。

蘭峰贈張九臯

文苑作扈  
從御宿池

君王既巡狩。輦路入秦京。遠樹低蒼壘。孤山入草城。寒  
疎清禁漏。夜警羽林兵。誰念迷方客。長懷魏國情。

草一作  
幔

綦毋潛

○宿龍興寺

香刹夜忘歸。松清古殿扉。燈明方丈室。珠繫比丘衣。白

月傳心淨。青蓮喻法微。天花落不盡。處處鳥銜飛。

方干

寄李頻

衆木已搖落。望君猶未還。軒車在何處。雨雪滿前山。思  
苦文星動。鄉遙釣渚閑。明年見名姓。惟我獨何顏。

君不來

閑花未零落。心緒已紛紛。久客無人見。新禽何處聞。舟  
隨一水遠。路出萬山分。夜月生愁望。孤光必照君。

白艾原客



原上桑柘瘦。再來還見貧。滄洲幾年隱。白髮一莖新。敗  
葉平空墜。殘陽滿近鄰。閑言說知己。半是學禪人。

鏡湖西島言事寄陶校書

樵獵兩三戶。凋疎是近鄰。風雷前壑雨。花木後巖春。文  
字不得力。桑麻難採貧。山禽欺稚子。夜犬吠漁人。未必  
聖明代。長將雲水親。知音不延薦。無路出泥塵。

旅次洋州寓居郝氏林亭

舉目縱然非我有。思量似在故山時。鶴盤遠勢投孤嶼。  
蟬曳殘聲過別枝。涼月照窻欹枕倦。澄泉遶石泛觴遲。

青雲未得平行去。夢到江南身旅羈。

龍泉寺絕頂

未明先見海底日。良久遠雞方報晨。古樹含風常帶雨。  
寒巖四月始知春。中天氣爽星河近。下界時豐雷雨勻。  
前後登臨思無盡。年年改換往來人。

經陸補闕故山

不敢要君徵亦起。致君全得似唐虞。讜言昨嘆離天聽。  
新塚今聞入縣圖。琴鎖壞窻風自響。鶴歸喬木夜難呼。  
學書弟子何人在。檢點猶逢諫草無。



靈一

同史君宿大梁驛

旌旗江上出。花外卷簾空。夜色臨城月。春寒度水風。雖然行李別。且喜語音同。若問匡廬事。終身愧遠公。

重還宜豐寺

再過招隱寺。重會息心期。樵客問歸日。山僧記別時。野雲陰遠甸。秋雨漲前陂。勿謂頻來此。吾今不好奇。

酬皇甫冉將適越於雲門寺贈別

湖南通古寺。來往意無涯。欲適雲門寺。千峰到若耶。春

山子敬宅。古木謝敷家。自可長偕隱。那言相去賒。

無可

晚秋寄賈島

暗菴生暮色。默思坐西林。聽雨寒更盡。開門落葉深。昔因京邑病。併起洞庭心。亦是吾兄事。遲回直至今。

送呂郎中赴海州

出守滄洲上。西風送佩旌。路遙過幾郡。地盡到孤城。拜廟千山綠。開樓遍海晴。何人共東望。月向積濤生。

同劉升宿



浮雲流水心。只是愛山林。共恨多年別。相逢一夜吟。既  
能持苦節。勿謂少知音。憶就西池宿。月圓松竹深。  
護國

贈王山人

湖上見秋色。曠然如爾懷。豈惟歡隴畝。兼亦外形骸。待  
月歸山寺。彈琴坐暝齋。布衣閑自貴。何用謁天階。  
貫休

寒思廬山賈生

山兄詩癖甚。寒夜更何爲。覓句如頑石。嚴霜打不知。石

膏粘木屐。厓栗落冰池。近見禪僧說。生涯勝往時。  
如一作唯

石一作坐

題簡禪師院

機忘室亦空。靜與沃州同。惟有半庭竹。能生竟日風。思  
山海月上。出定印香終。繼後傳衣者。還須立雪中。  
岑參

送韋侍御先歸京

聞欲朝龍闕。應須拂豸冠。風霜隨馬去。炎暑爲君寒。客  
淚題詩落。鄉愁對酒寬。先憑報親友。後月到長安。



送鄭少府赴滏陽

子真河朔尉。里邑帶青漳。春草迎袍色。晴花拂綬香。青山入官舍。黃鳥出宮牆。若到銅臺上。應憐魏寢荒。

張衆甫

送李司直使吳

使臣方擁傳。王事遠辭家。震澤逢殘雨。新豐過落花。水萍千葉散。風柳萬條斜。何處看離恨。春江無限沙。

張南史

送余贊善使還赴辟尚書幕

音書不可論。河塞雪紛紛。鴈足期蘇武。狐裘見辟君。城池通紫陌。鞍馬入黃雲。遠憶漳渠水。平流幾處分。

周朴

寄方干

桐廬江水閑。終日對柴關。因想別離處。不知多少山。釣舟春岸泊。庭樹晚烟還。莫便求栖隱。桂枝堪恨顏。

張蠙

送董卿知台州

九陌除書出。尋僧問海城。家從中路挈。吏隔數州迎。夜



蚌侵燈影春禽雜櫓聲開圖見異跡思上石橋行

弔孟浩然

每聽樵人說孤墳亦夜吟若重生此世應更苦前心名  
與襄陽遠詩同漢水深親栽鹿門樹猶蓋石床陰

別後寄友人

上馬如飛鳥翩然去隔塵共看今夜月獨作異鄉人就  
養江田熟移居井賦新襄陽所卜隱應與孟家鄰

張祐

觀徐州李司空獵

曉出郡城東分圍淺草中紅旗開向日白馬驟迎風背  
手抽金鏃翻身控角弓萬人齊指處一鴈落寒空

招隱寺

千年戴顓宅佛廟此崇修古井人名在清泉鹿跡幽竹  
光寒閉院山影夜藏樓未得高僧旨烟霞空暫游

金山寺

一宿金山寺微茫水國分僧歸夜船月龍出曉堂雲樹  
影中流見鐘聲兩岸聞因悲在朝市終日醉醺醺

惠山寺



舊宅人何在。空門客自過。泉聲到池盡。山色上樓多。小  
洞斜穿竹。重欄夾細莎。殷勤望城市。雲水暮鐘和。

李季蘭

送韓揆之江西

相看指楊柳。別恨轉依依。萬里西江水。孤舟何處歸。滄  
城潮不到。夏口信應稀。惟有衡陽鴈。年年來去飛。

許渾

算山津送客歸峽中

津亭多別離。楊柳半無枝。住接猿啼處。行逢鴈過時。江

帆望風急。山月下樓遲。此夕歸城郭。不眠人詎知。

凌歊臺

宋祖高高樂未回。三千歌舞宿層臺。湘潭雲盡暮山出。  
巴蜀雪消春水來。行殿有基荒薺合。寢園無主野棠開。  
百年便作萬年計。巖畔古碑空綠苔。

張佐

憶遊天台寄道流

憶昨天台到赤城。幾朝仙籟耳中生。雲龍出水風聲急。  
海鶴鳴臯日色清。石笋半山移步險。桂花當澗拂衣輕。



今來盡是人間夢。劉阮茫茫何處行。

馬戴

集宿姚侍御宅懷永樂宰殷侍御

石田虞芮接。種柳白雲陰。穴閉神踪古。河流禹鑿深。樵人應滿郭。僊鳥幾巢林。此會偏相語。會供雪夜吟。供一作同

送人遊蜀

別離楊柳陌。迢遞蜀門行。若聽清猿後。應多白髮生。虹霓侵棧道。雨雪雜江聲。過盡愁人處。烟雲是錦城。

張循之

○ 巫山高

巫山高不極。合沓狀竒新。暗谷疑風雨。幽崖若鬼神。月明三峽曙。潮滿九江春。若問陽臺客。應知入夢人。

張繼

巖陵釣臺

舊隱人如在。春風亦似秋。客星沉夜壑。釣石俯清流。鳥向喬枝聚。魚依淺瀨遊。古來芳餌下。誰是不吞鈎。

章八元

新安江行



江源南出永野飯斃維梢古戍懸漁網空林露鳥巢雪  
晴山脊見沙淺浪痕交自笑無媒者逢人作解嘲

李益

○喜外弟文言別

十年離亂後長大一相逢問姓驚初見稱名憶舊容別  
來滄海事語罷暮天鐘明日巴陵道秋山又幾重

同崔邠登鶴雀樓

鶴雀樓高百尺墻汀洲寒樹共茫茫漢家簫鼓隨流水  
魏國山河滿夕陽事去千年猶恨速愁來一日卽爲長

風煙併是思歸望遠目非春亦自傷

張喬

題河中鶴雀樓

高樓懷古動悲歌鶴雀今無野燕過樹隔五陵秋色早  
水連三晉夕陽多漁人遺火成寒燒牧笛吹風起夜波  
十載重來值搖落天涯歸計欲如何

呂溫

道州秋夜南樓卽事

誰令獨坐愁此日此南樓雲去舜祠閉月明湘水流猿



聲何處曉。楓葉滿山秋。不照匣中鏡。少年看白頭。

于鵠

贈隱者

去尋長不在。門似絕人行。床下石苔滿。屋頭秋草生。學  
琴冬日短。寫易曉窗明。惟到黃昏後。溪中聞磬聲。

崔顥

贈梁州張都督

聞君爲漢將。虜騎不南侵。出碛清沙漠。還家拜羽林。風  
霜臣節苦。歲月主恩深。爲語西河使。知予報國心。

項斯

春題湖上顧伐新居

近得雲山看。門長侵早開。到時猶有雪。行處已無苔。勸  
酒客初醉。留茶僧未來。每逢晴暖日。惟見乞花栽。

送殷乘遊邊

語別無長夜。燈前聞曙鴉。已行難避雪。何處合逢花。隴  
寺門多閉。荒樓酒不賒。還須問邊將。早晚是誰家。

山中

青櫪林中亦有人。一渠流水數家分。山當午後回峯影。



草帶泥痕過鹿羣。蒸茗氣衝茅屋出。線絲聲隔竹籬聞。  
行逢賣藥歸來客。不惜相隨入白雲。

崔峒

贈李明府

訟堂寂寂對烟霞。五柳門前聚曉鴉。流水聲中視公事。  
寒山影裏見人家。觀風競美新爲政。計日還應便觸邪。  
可惜陶潛無限酒。不逢籬菊正開花。

包何

和程員外春日東郊卽事

郎官休浣憐遲日。野老歡娛爲有年。幾處折花驚蝶夢。  
數家留葉待蠶眠。藤垂委地紫朱履。泉長侵階浸綠錢。  
直到閉關朝謁去。鶯聲不散柳如煙。

竇常

之任武陵。寒食日途次松滋渡。先寄劉員外禹錫。  
杏花榆莢曉風前。雲際離離上峽船。江轉數程淹驛騎。  
楚會三戶少人煙。看春又過清明節。算老重經癸巳年。  
幸得桂山當郡舍。在朝長咏卜居篇。

趙嘏

夜少集



長安秋望

雲物淒涼拂曙流。漢家宮闕動高秋。殘星數點鴈橫塞。  
長笛一聲人倚樓。紫艷半開籬菊淨。紅衣盡落渚蓮愁。  
鱸魚正美不歸去。空戴南冠學楚囚。

薛能

獻僕射相公

清如水玉重如山。百辟嚴趨禮絕攀。強虜外聞應破膽。  
平人長見盡開顏。朝廷有道青春好。門館無私白日閑。  
致卻垂衣更何事。幾多詩句詠關關。

劉威

遊東湖黃處士園

偶向東湖更向東。數聲雞犬翠微中。遙知楊柳是門處。  
似隔芙蓉無路通。樵客出來山帶雨。漁舟過去水生風。  
物情多與閑相稱。所恨求安計不同。

鄭谷

鷓鴣

暖戲烟蕪錦翼齊。品流應得近山雞。雨昏青草湖邊過。  
花落黃陵廟裏啼。遊子乍聞征袖濕。佳人纔唱翠眉低。

時人稱鄭鷓鴣  
因有此作



相呼相喚湘江曲。苦竹叢深春日西。

韓偓

寄隱者

煙郭雲扁路不遙。懷賢猶恨□迢迢。長松夜落釵千股。小港春深水半腰。已約病身拋印綬。不嫌門巷似漁樵。渭濱晦迹南陽卧。若比吾徒更寂寥。

羅隱

揚州開元寺閣上作

滿檻山川漾落暉。檻前前事去如飛。雲中雞犬劉安過。

月下笙歌煬帝歸。江蹙海門颿散出。地吞淮口樹相依。紅樓翠幙知多少。長向東風有是非。

李羣玉

黃陵廟

小孤洲北浦雲邊。二女明粧共儼然。野廟向江春寂寂。古碑無字草芊芊。東風近墓吹芳芷。落日深山哭杜鵑。猶似含嚔望巡狩。九疑如黛隔湘川。

皮日休

過雲居院福上人舊居



重到雲居獨悄然。隔窻窺影尚疑禪。不逢野老來聽法。  
猶見隣僧爲引泉。龕上已生新石耳。壁間空帶舊茶烟。  
南宗子弟時時到。泣把山花奠几筵。

杜荀鶴

○春宮怨

早被嬋娟誤。欲粧臨鏡慵。承恩不在貌。教妾若爲容。風  
煖鳥聲碎。日高花影重。年年越溪女。相憶采芙蓉。

茅山

步步入山門。仙家鳥迳分。漁樵不到處。麋鹿自成羣。石

面迸出水。松頭穿破雲。道人星月下。相次禮茅君。

訪道者不遇

寂寂白雲門。尋真不遇真。只應松上鶴。便是洞中人。藥  
圃花香異。沙泉鹿跡新。題詩留姓字。他日此相親。

題王處士書齋

先生高興似樵漁。水鳥山猿一處居。石逕可行苔色厚。  
釣竿時斫竹叢疎。欺春只愛和醅酒。諱老猶看夾注書。  
莫道無金空有壽。有金無壽欲何如。

題覺禪



少見修行得似師。茅堂佛像亦隨時。禪衣衲後雲藏線。  
夏臘高來雪印眉。畊地戒侵連塚土。伐薪教護帶巢枝。  
有時問着經中事。却道山僧總不知。

張籍

薊北春懷

泖泖水雲外。望來鄉信稀。因逢過江使。却寄在家衣。問  
路更愁遠。送人空說歸。今朝薊城北。又見塞鴻飛。

過賈島幽居

青門坊外住。行坐見南山。此地去人遠。知君終日閑。蛙

聲籬落下。草色戶庭間。好是經過處。惟愁暮獨還。

羅道士

城市無人得寶年。衣襟長帶臭黃烟。樓中賒酒唯留藥。  
洞裏爭棋不賭錢。聞客語音知貴賤。對花歌詠似狂顛。  
尋常行處皆逢見。世上多疑是謫仙。

任蕃

葛仙井

古井碧沉沉。分明見百尋。味甘傳邑內。脉冷應山心。圓  
入月輪淨。直涵峯影深。自從仙去後。汲引到如今。



秋晚途次

秋色滿行路。此時心不閑。孤貧遊上國。少壯有衰顏。衆鳥已歸樹。旅人猶過山。蕭條遠林外。風急水潺潺。

劉商

○春日卧病

楚客經年病。孤舟人事稀。晚晴江柳變。春夢塞鴻歸。今日方知命。前身自覺非。不能憂歲計。無限故山薇。

楊發

南溪書院

茆屋住來久。山深不置門。草生垂井口。花落擁籬根。入院將鷓鴣。攀蘿抱子猿。會逢異人說。風景似桃源。處默

○題勝果寺

路自中峯上。盤回出薜蘿。到江吳地盡。隔岸越山多。古木藂青靄。遙天浸白波。下方城郭近。鐘磬雜笙歌。

戎昱

羅江舍

山縣秋雲暗。茆亭暮雨寒。自傷庭葉下。誰問客衣單。有



興時添酒無聊自整冠。近來鄉國夢。夜夜到長安。

于良史

冬日野望長安

地際朝陽滿。天邊宿霧收。風兼殘雪起。河帶斷水流。北  
闕馳心極。南圖尚旅遊。登臨思不已。何處可銷憂。

王灣

○次北固山下

客路青山外。行舟綠水前。潮平兩岸濶。風正一帆懸。海  
日生殘夜。江春入舊年。鄉書何處達。歸鴈洛陽邊。

林寬

送惠補闕

詔下徵巖野。高人入仕林。長因抗疏日。更作去官心。清  
俸供僧盡。滄州寄跡深。東門有歸路。徒自棄華簪。

劉禹錫

蚤春對雪寄澧州元郎中

新賜除書墨未乾。賢人蹙屈遠人安。朝驅旌旆行時令。  
夜見星辰憶舊官。梅蘂覆階鈴閣煖。雪峯當戶戟枝寒。  
寧知楚客思公子。北望長吟澧有蘭。



送河南馮尹之任

可憐五馬風流地。雙綴金貂侍從才。閣上掩書劉向去。  
門前修刺孔融來。峭陵路靜寒無雨。洛水橋長晝起雷。  
却羨府中棠棣好。先於城外百花開。

裴相公見示荅張秘書謝馬并詩羣公屬和

草玄門巷少塵埃。丞相并州寄馬來。初自塞垣銜苜蓿。  
忽行幽徑破莓苔。尋花緩轡威遲去。帶酒垂鞭蹀躞回。  
不與王侯與詞客。知輕富貴重清才。

酬竇使君寒食日松滋先寄

楚鄉寒食橘花時。野渡臨風駐彩旗。草色連雲人去住。  
水紋如縠燕差池。朱輪尚憶雙飛雉。青綬猶懸左顧龜。  
非是湓城白司馬。水曹何事與新詩。

寄朗州溫右史曹長

甃別瑤池鴛鷺行。綵旗雙引到沅湘。城邊流水桃花過。  
簾外春風杜若香。史筆枉將書紙尾。朝纓不稱濯滄浪。  
雲臺功業家聲在。徵詔何時出建章。

江陵泂流道中

三千三百西江水。自古如今要路津。月夜歌謠有漁父。



風天氣色屬商人。沙村好處多逢寺。山葉紅時各勝春。  
行到南朝征戰地。古來名將盡為神。

酬樂天楊州初逢席上見贈

巴山楚水<sup>淒涼</sup>淒涼地。三十三年棄置身。懷舊空吟聞笛賦。  
到都翻似爛柯人。沉舟側畔千帆過。病木前頭萬葉春。  
今日聽君歌一曲。暫憑杯酒長精神。

題于家公主舊宅

樹滿荒臺葉滿池。簫聲一絕草蟲悲。鄰家猶學宮人髻。  
園客爭偷御菓枝。馬埒蓬蒿藏狡兔。鳳樓烟雨嘯愁鴟。

何郎獨在無恩澤。不似當年傅粉時。

王貞白

金陵

恃險不種德。興亡歎數窮。石城幾換主。天塹漫連空。御  
路疊民塚。臺基聚牧童。折碑猶有字。多紀晉英雄。

紫芝與徐璣徐照翁卷。號宋末四靈。葉正則稱  
其同能為唐詩者。紫芝雖獨登科。官亦不顯。肆  
力吟事。欲追開元元和之盛。其所選衆妙集。不  
遜元結韋穀諸家。余向覓之未得。丙子秋杪。寒



山趙靈均忽緘此書與馮定遠見寄云是嘉興屠用明託余刻者予狂喜彌日因憶放翁句云名酒過于求趙璧異書渾似借荊州用明與余未識面乃不惜荊州之借真藝林同志亦公心也。以方之偶獲一帙秘諸枕中不肯示人者相去何以耶。余向彙唐之選唐詩其為海內快士所賞復欲梓宋元人選唐詩以續之茲集其嚆矢云。海虞毛晉識。

衆妙集

終

享和元年刊

奉呈土岐斜面翁 亦復冀同欣賞也

庚子晦日

嵯峨寬



